



忠簡宗公遺事卷第二

五月庚寅朔

王即皇帝位于南京大赦

天下曰皇天佑宋卜世過於漢唐藝祖承

周受禪同乎舜禹列聖嗣無疆之歷保邦

隆不拔之基屬以朝姦稔成邊釁恃中都

之安富忘外敵之憑陵馴致金人來犯京

邑初登城而不下終邀駕以僭行痛念鑿

輿遠征沙漠宗族從而盡徙宮闕爲之一

空仍抑臣寮俾僭位號朕以介弟之親而



受旨開元帥之府以總師方輸敵愾之忠
亟奉講和之詔豈圖變故終致貼危蓋嘗
指日以誓諸軍使前迎而後請不憚瀝血
而擻率土冀外附而內親而三事大夫與
萬邦黎獻共致樂推之懇靡容牢避之私
謂疊疊萬機難以一日而曠位矧皇皇四
海詎可三月而無君勉徇群情嗣登大寶
宵衣旰食紹祖宗垂創之基疾首痛心懷
父兄播遷之難顧號令久隔衆罔繫心軍

旅荐興民多失業慰民耳目之注敷朕腹
心之言爰布湛恩誕綏區夏可大赦天下
改元建炎於戲聖人何以加孝朕每懷問
寢之思天子必有所先朕欲救在原之急
嗟我文武之烈若時忠義之家不食而哭
秦庭士當勇於報國左袒而爲劉氏人咸
樂於愛君其一德以一心佇立功而立事
同候兩宮之復終圖萬世之安副我憂勤
躋時康乂以黃潛善爲中書侍郎汪伯彥

爲同知樞密院事辛卯詔元帥府限十日結局并詔公赴南京行在所甲午公上表賀曰二聖蒙塵乾坤改色萬邦後天日宜臨亟回謙避之誠丕慰顯昂之望人神昏慶夷夏聳傳臣中賀竊以大宋之應天順人太祖之創業垂統凡奕世盈成之嗣皆挺生睿智之姿其所以繼繼承承莫匪乎兢兢業業浸久太平之習稍忘禦侮之圖顧大臣熟此燕安致黠虜因茲

猖獗信和盟之妄議墮邀劫之姦謀人咸哀痛而籲天士欲奮張而盡敵然萬方之是賴須一人之作猷果下恤於蒸黎允上符於穹昊恭惟皇帝陛下稟虞舜之大孝體周文之小心既不得已而有臨宜大有爲而無倦如陽云復萬物自春如日初升九幽洞照嘉靖中興之事業戡除外侮之兇殘俾享于休以永至治臣蕩然朽質偶此熙辰屬總師徒進臻河朔慶雲龍之

會阻陪鳴玉之班依日月之光第切傾葵
之望乙巳准告覃恩轉朝請郎訓詞曰
朕纂服丕承疏恩大賚眷惟邇列宜在褒
嘉具位宗某執德粹明受材宏達自陞華
於法從良著績於周行加秩之行於昭新
渥輸忠之報益展素懷公拜命上表謝趙
無分兵河上量帶數百騎徑自衛南南華
詣行在所六月己未朔公入對氣哽不能
語涕泗交頤上亦爲之動容徐陳興衰

刻本無

撥亂大計極論當時人材上問勞甚厚
凡進四劄其一曰臣聞情生於愛愛生於
見見生於目之所遇與左右之所接所遇
所接果順於己則喜喜則賞之賞之者非
懋其功也賞其順己而已耳所遇所接果
逆於己則怒怒則罰之罰之者非罰其罪
也罰其逆己而已耳如是則賞罰出於喜
怒喜怒哀出於逆順可謂之公無私乎賞罰
私狗其何以礪世磨鈍大有爲於天下乎

聖人無我故忘情忘情故忘逆順忘逆順故忘喜怒哀怒故賞一善而天下之爲善者勸知其非私喜也罰一惡而天下之爲惡者沮亦知其非私惡也一賞一罰歸之至公而我無容心焉人其不心悅而誠服者乎 陛下所以號令天下使人知所趨知所避知所行知所止者賞罰而已昔文王一怒而安天下之民武王亦一怒而安天下之民是怒也豈發於目之所遇與

左右之所接哉彼賊虜橫肆兇暴侵犯我王室臣願陛下如文王武王亦一怒而安天下之民有賞有罰惟平惟一至於應酬萬機進退取予之際斷之至公以慰天下之望取進止其二曰臣聞人居職在論一相昔舜有天下選於衆舉皋陶不仁者遠湯有天下選於衆舉伊尹不仁者遠皋陶贊舜去四凶而後九德咸事庶績其凝伊尹贊湯革夏而後咸有一德格于皇天

是知不仁者遠不能播其惡於衆始能使
衆賢和於朝更相汲引以成大功也以人
君深居九重其彌縫燮理鎮撫表正但仰
成于朝而已高宗得傳說而商中興憲宗
得裴度而唐中興臣願陛下於稠人廣
衆中不以親疎不以遠近不以夢卜虛心
考御名參以國人左右之言爰立作相俾
之應變守文果得其人能率屬衆志交修
不逮其在位皆節儉正直小大之臣咸懷

忠良以持天下之正以成天下之務天下
其有不大治者乎陛下果尊道德遠邪
佞與大臣言欽而信毋使小人參焉與賢
者遊親而禮毋使不肖與焉用賢勿貳去
邪勿疑斯言行而天下治矣書曰知之非
艱行之惟艱知之不行無益也行之不至
無益也茲事在陛下力行之而已取進
止其三曰臣伏聞李絳見憲宗于浴堂殿
帝曰比諫官多朋黨論奏不實皆陷謗訕

欲謫其尤 何絳曰此非上意必愼
人以此熒誤上心自古納諫昌拒諫亡夫
人臣進言於上豈易哉君尊如天臣卑如
地加有雷霆之威彼晝度夜思始欲陳十
事俄而去五六及將以聞則又憚而削其
半故上達者纔十二何哉干不測之禍顧
身無利雖開納獎勵尚恐不至若譴訶之
使直士杜口非社稷利帝曰非卿之言我
不知諫之益且人君深居九重又以旒纒

蔽其聰明所以見天下之是非聞天下之
情僞者蓋用諫官代爲耳目俾姦邪讒慝
不敢掩其不善而見其善者也唐高祖太
宗初即位嘗賞孫伏伽蘇世長以激諫者
臣恭惟 陛下聲色貨利弗邇弗殖舍已
從人樂取諸人以爲善固無可諫者至於
臣下有懷姦藏慝嫉賢蔽善敢肆欺罔苟
徇明黨者當使耳目之官廣其聞見瀝心
彈糾毋有所隱以絕後艱取進止其四曰

臣聞天下之事爲於可爲之時則成爲於不可爲之時則敗成敗之機間不容髮是以古人有時哉弗可失之語恭惟陛下繼膺之照法乾之剛故見幾而作炳果斷而罔後艱成敗之機不出昭回之鑒臣復何言臣之誠心祇思狗國父荷眷遇臣非木石寧不自知然臣每見事當行請之必力言既拙直勢甚孤危願陛下察臣之衷力賜保佑使全骸骨以盡餘年臣之悃

以上刻不載

誠言不盡意取進止上有留中之意而左右不容癸亥以公爲龍圖閣學士知襄陽府提舉隨房郢州兵馬巡檢事訓辭曰唐太宗天策舊僚以次登用皆備公卿之選朕以元帥開府總兵朔方汝起滄陽之師寔爲攸助肆加褒擢無愧前聞具官某傳學雄文德行高節剛大之氣至老不屈縱橫之才應變尤長力陳排難之謀克奮勤王之志獨當一面聲望卓然有嘉翊戴

之功宜有褒遷之寵躡陞延閣之華序往
鎮襄陽之大邦共濟多艱益圖來效既通
二禁之籍勿替吾猷仍俾千里之民悉安
新政時復有割地之議公上疏曰臣聞天
下者我太祖太宗肇造一統之天下也
奕世聖人繼繼相承增光共貫之天下也
陛下爲天眷佑爲民推戴入紹大統固當
兢兢業業思傳之億萬世奈何遽議割河
之東又議割河之西又議割陝之蒲解乎

此三路者太祖太宗基命定命之地奈
何輕聽姦邪附賊張皇者之言而遂自分
裂乎臣竊謂淵聖皇帝有天下之大四
海九州之富兆民萬邦之衆自金賊再犯
未嘗命一將出一師厲一兵秣一馬曰征曰
戰但聞姦邪之臣朝入一言以告和暮入
一說以乞盟惟辭之卑惟禮之厚惟虜言
是聽惟虜求是應因循踰時終之 二聖
播遷后妃親王流離北去每念是禍正宜

天下臣子弗與賊虜共戴天弗與賊虜俱
生之日也臣謂陛下即位必赫然震怒
旋乾轉坤大明黜陟以賞善罰惡以進賢
退不肖以再造我王室以中興我大宋至
今四十日矣未聞有所號令作新斯民但
見刑部指揮有不得騰播赦文於河東河
西陝之蒲解茲非新人耳目也是欲蹈東
晉西遷既覆之轍耳是欲裂王者一統之
緒爲偏霸耳爲是說者不忠不孝之甚也

以上刻字
既自不忠不孝又壞天下志義之心禡天
下忠義之氣俾河之東西陝之蒲解無路
爲忠爲義是賊其民者也臣雖駑怯當躬
冒矢石爲諸將先得捐軀報國恩足矣臣
衰老不勝憤痛激切之至上聞其言

之戊辰改知青州尋以公知開封府訓辭
曰朕哀憫元元間罹兵禍思欲濯瘡痍爲
煥寒變呻吟爲謳歌用以靈承顧諟之命
庶幾休息惟京師雜五方之俗事繁物大

號稱難治、間勞侍從之良、典司尹正之重、
以爾氣渾而質厚、中偉而外莊、篤望可以
鎮浮、長才足以周變、優游兩禁、譽處益隆、
是用輟青社、賜履之邦、蒞三輔、浩穰之寄、
惟爾迺者、從朕兵間、訐謨密勿、固知子德、
意志慮所、鄉矣、徃宣爾術、底于輯寧、益昭
爾庸、用符僉屬、公拜命、即日就道、以七月
乙亥到京城、京城自虜騎退歸、樓櫓盡廢、
諸道之師、雜居寺觀、盜賊縱橫、人情恟恟、

時

日虜留屯河上、距京城無二百里、金鼓之
聲、日夕相聞、京畿千里之民、與京東西進
亘數千里、咸懷悚慄、公到郡、首發為賊之
淵數者三、數人誅之、又令都市曰、為盜者
賊無重輕、並從軍法、由是豪強退縮、賊盜
屏竄、人皆靡然、悅服、咸賴以安、且曰、今有
宗公、我不危矣、公察人情粗安、市肆商賈
稍稍如舊、上疏乞回鑿、曰、臣聞三代之得
天下也、得其民也、得其民有道、得其心也、

得其心有道所欲與之聚所惡勿施爾也
是則得民之道在察其心之所欲與其心
之所惡而已此古人所以有天時不如地
利地利不如人和之語求民之和豈必家
至戶到一二而求之哉應天順人成天下
之大順則民不期和而自和矣臣蒙恩差
知開封府臣雖衰老無能又知開封府染
習僞命諸統制以下皆是招募惡少亡命
無賴者臣既領府事更不敢徇身自顧但

以正道瀝誠感之不旬浹間彼惡少輩咸
知格心爍謀斂迹遁去其閭巷間亦自然
悛改上下帖然無復肆橫以是人人鼓舞
仰陛下之威懷陛下之惠拳拳慕戀
不啻嬰兒之慕父母咸思發憤敵其所愾
臣每體問王畿內外日以嘉靖熙熙皞皞
將如我祖宗慶祐熙豐時臣觀人心念
念僉望者惟願陛下子龍之御警蹕之
聲千乘萬騎來歸九重以副萬邦切切系

戀之誠取進止時詔荆襄江淮悉備巡幸
有維揚金陵之議公復上疏曰臣聞禹之
行水行其所無事所謂無事非泊然無所
爲於事也事無事而已夫禹蒙天錫洪範
九疇知水有潤下之性且親見堯有洪水
滔天績用弗成之患遂因水之性而順道
之故天下免乎昏墊而奠厥攸居茲無他
皆堯用禹之力也臣竊聞將士籍籍皆願
陛下歸京師云京師是衆兵駐劄之本根

也商旅籍籍皆願陛下歸京師云京師
是天下賈販之要區也農民居籍籍皆願
陛下歸京師云京師是天下首善之地也
士大夫懷忠義者籍籍皆願陛下歸京
師云京師是陛下朝宗之域也臣前在
臨濮兵寨中寔憂群臣無遠識見恐贊
陛下去維揚金陵又見京城有賊臣張邦
昌僭竊與范瓊輩擅行威福無所忌憚所
以曾暫乞駐蹕南都以觀天意以察人心

仰蒙聽從、臣誤被宸恩、差知開封府事、今到二十餘日、物價市肆、漸同平時、每觀天意、眷顧清明、每察人心、和平逸樂、且商賈農民、士大夫懷忠義者、咸曰、若陛下歸正九重、是王室再造、大宋中興也、臣竊料百僚中、唱為異議、不欲挽陛下歸京師者、不過如張邦昌等姦邪輩、陰與賊虜為地耳、臣願陛下體堯禹順水之性、順將士、順商旅、順農民、順士大夫之懷忠義者、

早降勅命、整頓六師、及詔百執事、示謁宗廟、垂拱九重之日、毋一向聽張邦昌姦邪輩陰與賊虜為地者之語、不勝幸甚、臣之少也、猶不如人、今年六十九矣、眷眷血誠、恨其學問荒鄙、不能以感激忠義之辭、仰動天聽、臣不勝涕泣痛怛之至、取進止、一日、虜有八人、以使偽楚為名、直至京師、公訝之、曰、是必假此名、以覘我虛實、因納議狀、遺范公留守、請收置牢狴、奏取朝廷指揮、范公

然之即具奏聞公復上河北京東路稅鹽
劄子曰臣竊見京東路青相密登萊皆產
鹽自太府卿鄭僅建請行東北鹽其產鹽
州縣並行稅鹽法宣和三年宰相王黼用
事始罷河北京東稅鹽其意只欲在京推
貨務入納數多應副目前用度遂爲東北
之害者十年臣亦嘗歲計之行鈔鹽比之
稅鹽大段虧少蓋稅鹽不拘錢數多寡皆
可買販故民易得於鹽若鈔鹽非富商大

賈以千萬計不能爲也方無事時商賈尚
且乘時要利使人食貴鹽况今道路梗澁
商賈不行以今歲春夏觀之鈔鹽無處賈
販遂令爲盜販者專其利其偷竊官鹽又
不知幾何欲乞特降睿旨將宣和三年以
前稅鹽地分並依舊法不惟官收其利以
資州縣闕乏亦可止絕私販兼於鹽法別
無妨礙委實經久可行實有助於州縣糴
本且安京東河北兩路人心取進止八月

壬戌以公兼京師副留守會范訥罷除公
延康殿學士京城留守兼開封尹訓辭曰
汴居鄭滑曹許之間其地平衍無山河百
二之固太平日久人亦墮驕駝駝不武一
經胡塵矍然惕息尤欲得人而綏輯之具
位某頃守滏陽一節不撓艱難險阻忠力
彌劬身膺簡寄更試留籥曾未閱月政聲
流聞延登祕殿之華增重畿封之任爾其
戢姦恤隱酌寬猛之中使民畏而愛之稱

朕畀付之意公具狀辭免曰蒙恩除臣前
件官職伏念臣材力綿弱素無所長况當
衰老尤不克任若只尹府事已是強勉不
前日虞曠弛今更兼留司職務必不能辦
集伏望 聖慈察臣愚衷追寢成命庶免
誤恩仰玷 聖知臣不勝至誠激切懇避
之至降詔不允曰省所奏辭免恩命事具
悉國家制鈞諸郡溥循銅虎之規體重別
都特厚玉麟之寄矧今京邑寔古大梁億

載之所卜年 列聖於斯御極肆朕纂承
之始暫為巡狩之行倚責臣而居留仍兼
官於尹正庶幾彈壓克用救寧御堅強敢
為慷慨自信威足以禁暴明足以督姦善
良恃以帖安豪猾為之戢息茲陞華於祕
殿俾增重於中都何必謙撝形於奏牘往
膺褒顯以副眷懷所請宜不允上表謝遺
檢無繼奉詔令將所拘留虜使遷置別館優
加待遇公上疏曰臣伏見我 國家承平

幾二百年數世戴白之老不識兵革上下
恬嬉夷猶度日不復以權謀戰爭事為念
乃以賊虜誕謾為可憑信朝廷恬視不少
置疑不惟不魯教人坐作進退擊刺挽射
之伎俾嚴攻討其間有實欲賈勇思敵所
愾之人士大夫不以為狂則以為妄因循
苟且致使賊虜顛越不恭遂有前日之禍
臣不勝憤恨然茲非賊虜之能也皆由亡
誠實之士鼓倡驕逸率以斂跡逃避屈辱

不耻為智為勇爾萬一有慷慨論列則掩
耳不聽別造佞說以相浮動茲無他大抵
只欲助賊張皇聲勢直為我祖宗一統
之基業更不當顧藉宜兩手分付與賊虜
耳嗟乎何不忠不義之甚也臣每思念涕
泗交下繼之以血此天地神明之所昭監
臣恭聞 淵聖皇帝靖康之初信此和議
俾賊大獲而歸去冬與今春賊虜猖獗大
臣柔邪諛佞蓄縮畏避者不敢略有拒抗

之語但以詭譎為誠實包藏為智謀緘默
為沈鷲遂致 二聖蒙塵 后妃親王與
其無辜乏人流離北去想 陛下龍潛濟

鄆嘗親聞見張邦昌耿南仲輩所為也

陛下入繼大統即將前所和議者竄之嶺
外使天下冤抑之氣一旦舒快自後臣竊
謂 陛下與二三大臣論思講畫必欲大
雪我廟朝之耻激厲卒任勸率義士俾思
勤絕以正夷夏不意 陛下復聽姦邪之

語又浸漸望和迂回曲折為退走計臣願
陛下試一思之陛下初即位何故以講和
為非遂逐當時議臣陛下近日又何故
只信憑姦邪與賊虜為地者之畫營繕金
陵迎奉元祐太后仍遣省官迎奉太
廟本主弃河東河西北京東京西淮南
陝右七路千百萬生靈如糞壤草芥略不
顧恤比賊虜遣姦狡小醜假作使偽楚為
名來覘我大宋虛實臣見如是因納議狀

與留守范訥乞收賊虜奉使之入置之牢
狴奏取朝廷指揮庶激軍民士庶懷寬之
人俾肯力戰仰贊陛下再造王室中興
大宋基業之意今却令置別館優加待遇
臣奉此詔命憂思涕泣心欲折死不知二
三大臣何為於賊虜情款如是之厚而於
我國家訐謨如是之薄臣每思京師人
情物價幸漸如我祖宗時若鑿駕一歸
則再造之功與中興之烈必赫奕定大跨

商周而越漢唐矣何姦邪之臣尚狃和議
惶惑聖聽伏望 陛下察臣之樸愚必不
敢奉詔以彰國弱此我大宋興衰治亂之
幾臣願 陛下察之 陛下果以臣言為
狂願盡賜褫削投之瘴煙遠惡之地以快
姦邪賊臣之心不勝痛憤激切哀懇之至
臣藉藁闕下以俟誅戮再奉詔曰卿彈壓
強梗保護都城寬朕顧憂深所倚仗但拘
留金使未達朕心朕之待卿盡矣卿宜體

利平

此公奉詔即出八人縱之上表謝曰懷柔
遠人親灑宸翰既哀矜於僞使復肆宥於
愚臣仰承曠蕩之湛恩但增感涕恭俟熒
煌之法駕早賜回鑾中謝伏念臣垂釣渭
濱耦耕莘野居有厲業之志誓端造膝之
誠斷斷無他皇皇有素偶承宣於滄水辱
顧盼於潛龍依日角之照臨見天顏之咫尺
恪攄情悃瀝竭論思願戡外侮之艱難
力助中興之事業曩聞虜使祗賫僞楚之

書因憤戎心失奉本朝之意是將藉口以
覘虛實欲言合衆以苟侵陵實不憤於誕
謾遂乞收於囹圄庶全國體以爍姦謀豈
敢涉於自專乃上貽於北顧恐懼承旨蒼
惶改圖文形雲漢之昭回精神洗滌筆現
奎躔之赫奕耳目疏通旋收錯愕之魂仰
認撫綏之意更聽警蹕永保生成丙寅
詔賜對衣金帶上表謝曰猥叨眷獎併冒
寵光分內府之衣而副之兼金出上廡之

馬而飾以華校曳婁知感負乘增羞伏念
臣濫中儒科沉駕仕路偶緣遭遇游被使
令縈帶爲城本無善策下車搏虎徒有壯
心雖殫犬馬之勞曾乏絲毫之効敢圖異
數誤逮孤愚不稱身章尤慙庶錫此蓋伏
遇 皇帝陛下法天地之健躬攬萬機合
日月之明光被九有察臣腹心忠義曲賜
顧憐知臣蹤跡羈單每加覆露故令衰朽
亦玷恩榮臣謹當克勵駑庸勉效綿薄雖

逼桑榆之景敢渝金石之心知無不為深
戒容身之計老當益壯永懷報主之忠時
議者多以公拘囚金人為非獨尚書左丞
許景衡知公最深上疏辨之曰臣竊聞議
者多指開封尹宗某過失事未知是否如
何宗某之為人及其為政固不能上逃
聖鑒第未知果指何事而言也若只拘留
全國使人此誠宗某之失也然原其本心
只緣忠義所激出於輕發未審國家事體

耳不知別有何等罪犯也然臣自浙渡淮
以至行在得之來自京師者皆言宗某之
為尹威名政術卓然過人誅鉏強梗撫循
良善都城帖然莫敢犯者又方修守禦之
備歷歷可觀臣雖不識其人竊用歎慕每
以為去冬京城之內不能固守良由大臣
無謀尹正非才之故使當時有如宗某等
數輩赤心許國相與維持則其禍變亦未
至如此其酷也往者不可咎來者猶可追

今若較其末度小疵便以為罪而不顧其
盡忠報國之大節則臣雖至愚竊以為過
矣况宗某昔在河朔遭遇陛下遞留拱
衛繼參幕府宣力為多今尹天府其績效
又章章如此則其所為終始亦可考矣而
議者獨不能少優容之其不恕亦已甚且
開封宗廟社稷之所在其擇人居守尤非
他州別路之比今若罷宗某則當別選留
守不識今之搢紳其威名政績亦有加於

宗某者乎若有其人則除授交割尚費日
月兵民亦未信服防秋是時計將奈何若
未有其人則宗某未宜遽然更易也人才
難得又矣惟聖人以天地為度包容長養
兼收而並用之庶幾其濟也其宗某伏望
聖慈上為宗廟社稷下為京師億萬生靈
特賜主張厚加委任使成禦戎治民之功
天下幸甚八月二十八日奉 聖旨朝廷
別無行遣亦無臣寮論列章疏劄下照會

刻年

右劄送京城留守宗延康公拜命上表稱
謝遺失九月真定懷德間賊兵甚盛州郡
有乘城固守者賊亦大治兵爲攻拔計公
欲時暫過河措置事宜乙未上劄子曰臣
契勘河北西路真定懷衛濬等處見有番
賊占據今又分留賊馬於洛州四向劄寨
密裁鹿角意欲攻打若河西諸州不守即
賊之姦計包藏不淺京師雖爲備禦未易
可居臣爲見有上件事宜已於今月初七

日統押人馬自游家渡過河會約河西忠
義統制等商議隨宜措畫若事理可行即
一面招集同心叶力以圖收復安集流移
久遠之利若賊勢厚重未可施行即具所
見利害的確便宜畫一敷奏伏望 聖慈
體念河北繫天下根本河北不守則干戈
弓矢未易橐戢臣每思前日之失蓋由將
相恃賴太平恬不爲恤朝進一言暮入一
說惟以講和乞盟爲意今更訟襲不修武

備臣竊憂之兵法曰先為不可勝以待敵
之可勝臣不揆衰繭無能見過河相度別
具奏聞者庚子公回自河北具因依奏聞
遺失辛丑准省劄曰臣寮上言竊觀去冬
京師失守城池非不高深兵甲非不堅利
士卒非不衆多然上下弛慢嬉戲城上坐
觀其填壕復縱其登城公然逃遁無復衛
上之心在於城內者反道虜寇劫掠居民
遁於城外者結集徒衆焚劫州縣逮今未

能偃兵可以為戒若命留守司於胡虜登
城之所三二百步內考驗將士吏卒姓名
效命致死者褒其忠義賞賚其家永保廩
給逃遁得生者梟首示衆屏逐其家永離
其處則人知效死者享榮名而福家屬偷
生者受顯戮而禍妻孥忽再有師旅之事
其誰不以死衛其上乎是亦中道不為慙
酷前此留守庸懦回邪臣不敢獻言慮其
敗事臣至東京備問留守宗某剛明果斷

忠義激昂必能爲 陛下分別功罪明正賞
罰使信義昭著威令必行故敢上陳愚慮
伏望 陛下斷自宸衷密付宗某使專一
施行先給效命者之賞則逃遁者得矣九
月五日三省同奉 聖旨依令宗某具功
罪尤甚之人申取朝廷指揮右劄送東京
留守宗延康准此繼拜詔獎諭曰昔趙廣
漢之尹京兆吏民稱頌不容口以謂自漢
興治三輔者皆莫能及朕念京師兵火之

後遴選綏撫彈壓之才以卿帥府舊寮從
班耆舊擢居戶正之任肅然政令之行摧
折豪強發摘姦伏剛果不撓盜賊屏跡夷
考前躅能以嚴治威克允濟亦莫如卿比
陞祕殿之隆名仍專留司之重寄視古無
愧乃績可嘉載惟王畿千里之封實爲諸
夏本根之地都邑閭閻之衆旣遂謐寧旬
服田畝之間益當安輯以至練防衛之兵
謹城守之備經費計用預思可繼之圖極濟

艱虞務存善後之策諒卿體國之志必通
時事之宜嗣有罷休靡忘褒贊故茲詔示
想宜知悉上表謝曰守麟符之兩月方懼
罔功下漢扎於九天遽叨睿獎恩言曲逮
小已增榮中謝竊惟京邑衆大之居實爲
諸夏本根之地封畿廣遠民物浩穰豪強
萃聚而彈壓當先姦伏紛拏而發摘匪易
比在熙平之盛尚稱綏撫之難况當兵火
被毒之餘繼以府治曠官之後閭閻彫弊

綱紀情隳凶殘罔畏於明刑掠奪公行於白
晝仰勤憂顧誤被東求而臣學昧知方器
非任重徒抱孤忠而許國妄期薄效以報
君初抵都畿首蠲宿蠹粗獲姦暴剪蕩寇
攘良民獲奠枕之安昏夜罕鳴抱之警悉
奉行於條詔偶坐格於謚寧陛下憐臣
帥府參籌叨塵簪履之舊念臣神州領戶
粗宣犬馬之勞特陞祕殿之隆名仍畀留
司之重寄深虞尸素仰玷倚毗茲蓋伏遇

皇帝陛下秉如神之智以臨照百官體遠
下之仁以駕馭群俊彰德非專於爵賞念
功思奉於綸言冀風勸於臣隣俾日新於
事業致茲庸陋獲預寵褒臣敢不祇服訓
辭恪司管鑰金城雉堞嚴守禦以增崇甸
服田疇咸勞來而安輯經費務先於實粟
練兵敢怠於防秋預畫事宜悉符告戒刻
宸章於琬琰式昭天府之榮觀傳寶訓於
雲來永侈老臣之知遇更殫九殞少補萬

分公感 上知遇益自奮勵京城四壁各
置統制統領守禦使臣每壁立界至以所
招義兵分隸之隨處置教場為閱習訓練
之地造決勝戰車又據形勝立堅壁二十
四所於城外隨小大駐兵數萬別選有謀
略勇敢之士四人充四壁提領公往來親
按試之周而復始略不少怠沿大河鱗次
劄連珠寨結連河東河北山水寨忠義民
兵及陝西京東西路諸路人馬咸願聽公

刻無

刻在此後尚有
三頁

節制開五丈河以通東北商旅京畿十六
縣內兩縣瀕河共七十二里均之設縣縣
護四里有哥各令開壕深廣丈餘於南岸
埋鹿角內又團結班直諸班人兵外則隨
寨軍兵百姓丁壯等以備緩急之舉各有
條叙人情安妥乙巳上表曰臣聞君陳之
尹東郊深勅謀猷之告后宋璟之守京兆
極明得失而進言皆所以啓沃君心箴規
政闕矧荷聖神之知眷有懷宗社之安危

上接舊本第二卷第

二十八頁

表文刻本俱未載

表文云、奏入不報再上疏疏文云、不

報再上疏疏文云、不報再上疏疏文云

云有詔遣官迎奉六官往金陵公復上疏

疏文云、公防狄之具悉備宮室宗廟有

府臺部竝見營葺規模宏麗不減全盛時

以東門迺回鑾迎奉之地嘗加增修所分

布人馬及閱習戰車招集人兵足以禦敵

十月戊午復上疏疏文云、公前後申明

多降特旨事繇三省樞密院則沮抑之至

是公條具五事

疏文云

聞有詔車駕還

闕公上表

表文云

繼拜詔將還闕公喜

甚再上表

表文云

公自留鑰甫半載威

譽四馳遠近歸心招致賊徒如王再興兵

五萬李貴兵幾二萬人往來淮上王善兵

號七十萬騎護萬乘寇濮州楊進自號沒

角牛兵三十餘萬并王大郎等諸頭項人

馬百餘萬衆所至侵掠公遍遣人喻以禍

福招來之群盜素知公悉聽命相繼而至

楊進者尤所敬慕咸願効死軍聲甚振公

喻曰軍中老弱婦女久被驅虜吾不忍其

無辜宜盡釋之進等奉命諸軍所放幾萬

人王善時已寇濮州直欲來據京城公單

騎往造賊巢親招之公一見但執其手仰

天號泣謂之曰朝廷當危難時無一人出

為時用使當時有如公輩豈復有今日患

善感泣曰敢不効力諸將謂公此行不返

及歸迎於郊公曰事畢矣善隨以降伏來

有帶甲解甲之請幕下未有處公據案命
筆書從便二字越三日來降止以五百甲
騎隨餘皆解甲既至左右止之曰此畱守
司門擅入者斬善乃下馬趨入拜於庭公
繼以禮接之曰軍禮不得不如此乃延之
飲許以節使臨行請公到寨撫諸軍將有
請勿行者公獨信之篤入其寨第賞有差
時岳飛偶犯有司欲正典刑公一見竒之
曰此將才也畱軍前適羽報虜犯汜水遣

飛為踏白使以五百騎授之公語曰吾釋
汝罪今當為我立功且戒無輕鬪飛稟命
即行凱還補為統領後遷總制自是軍聲
大振公誅鋤強梗撫民居經制財用各有
條緒凡兩河京東西州郡文移往來求軍
需者則撤在京所有隨多寡應之欲其同
心濟難不以彼此為間時行在所遣中使
傳宣撫問上表謝表文云繼聞車駕南
幸公復奏疏疏文云批答曰朕惟上都

據四方之中開基歷十世之久祇宗創業
置諸奠枕之安城社奔流勢若建瓴之順
茲請特巡之制姑為近甸之行思宏濟宇
艱難致殫勞於櫛沐每念本根之重嘗思
監寐之懷迄綏靖於侯邦即趨歸於觀闕
任卿司守缺在王畿共傾戴后之誠來効
回鑿之請睠言忠藎良劇嘆嘉奉公御筆
聞京師有稱御前收買珠玉人紛擾民間
或至強市仰臣立賞委緝捕人收捉及出

下接第二卷末表

榜告報都人上表謝

表文云

舊本忠簡宗公遺三卷係景宗刻鈔
者前後多缺葉因取刻本補錄之以
便觀閱但表疏俱未載姑闕之俟得
全集重補入也庚子清和月初五初
六兩天抄畢另裝一冊杏憲識

列本号

聽徹要荒之表好惡所示治忽可稽弗翦
茅茨堯俗於變躬履革舄漢治勃興深惟
治化之端實以樸儉爲本恭惟 皇帝陛
下秉德紹統建極御圖誠意正心以齊家
國復朴崇本以律士民念國步之猶艱慨
民俗之寢靡克勤克儉去泰去奢屏服用
玩好之竒聚左右圖書之富申嚴厲禁豈
特却璀璨之珍昭示儉純蓋將揚絲綸之
化農知重穀而力穡士知守義以遵繩革

利本此故為有半頁

蟬之儲奢成行黃之忠厚一人表正四海傾風臣猥以非才謬膺繁使惟矢撐直以報國不敢偷薄以示民仰聖訓之丁寧激孤衷而抃躍臣敢不播宣純儉之化恪遵禁令之嚴一道德以同俗風冀追太古修政事而攘夷狄行見至平十二月甲子番寨駐于大河之北大會酋長引兵至河上稍稍南渡西犯汜水北侵胙城虜人雖知公名不敢輕入亦時擁眾以擾瀕河郡縣滑

此頁亦從刻本補

州以南沿河諸寨欲併兵方戰斷河梁申乞授師議者曰賊鋒未易當不若堅守自固公笑曰公冬城潰正坐此耳厥鑿不遠尚可襲耳命統制劉衍趨滑劉遠走鄭各提兵二萬戰車二百乘以分賊衝突之勢且戒諸將不得輕動極力保護河梁以俟大兵過河毋致臨期誤事虜聞之迺夜斷河梁而遁所獲甚眾

忠簡宗公遺事卷第二畢

